

**PRK Teluk Intan Perteguhkan Semula Parti Gerakan - Mah
Bernama
Jun 1, 2014**

TELUK INTAN, 1 Jun (Bernama) -- Kemenangan Datuk Mah Siew Keong pada Pilihan Raya Kecil (PRK) Parlimen Teluk Intan semalam bukan hanya memperkukuhkan kedudukannya sebagai Presiden Gerakan tetapi turut memperteguhkan kedudukan parti itu yang dianggap sebagai 'parti matahari terbenam.'

Mah berkata kejayaan itu membuktikan Gerakan bukan sebuah parti yang bakal malap seperti yang didakwa, sebaliknya akan terus meningkat dengan sokongan semua kaum.

"Jika (saya) kalah, saya rasa Gerakan akan berdepan masalah sebab kami perlu mengubah atau mendapatkan pemimpin baharu untuk merombak parti," katanya kepada pemberita selepas berjumpa pengundi di Pasar Besar di sini untuk mengucapkan terima kasih atas pemilihannya sebagai anggota Parlimen Teluk Intan setelah dua kali gagal mempertahankan kerusi itu sejak Pilihan Raya Umum 2008.

Mah dipilih sebagai presiden baharu Gerakan pada pemilihan parti 26 Okt 2013, setelah mengalahkan pencabarnya, Pengerusi Gerakan Pulau Pinang Datuk Teng Chang Yeow dengan memperoleh 1,086 undi berbanding Teng 577 undi.

Beliau menggantikan Tan Sri Dr Koh Tsu Koon yang meletak jawatan sebagai Presiden Gerakan berkuat kuasa 16 Mei 2013 sebagai memikul tanggungjawab atas kekalahan teruk parti itu pilihan raya umum ke-13.

Pada PRU 2013 Gerakan hanya memenangi satu kerusi Parlimen iaitu Simpang Renggam, dan tiga kerusi Dewan Undangan Negeri - Sidam, Kedah; Pemanis, Johor dan Tanjong Papat, Sabah daripada 11 kerusi Parlimen dan 31 kerusi DUN yang ditandingi parti itu.

Sebelum itu, pada PRU 2008, Gerakan memenangi dua kerusi Parlimen dan empat kerusi DUN, dan kerajaan negeri Pulau Pinang yang diketuai parti itu sejak 39 tahun, jatuh kepada DAP.

Mah berkata beliau akan terus berusaha untuk memperkukuhkan Gerakan seperti yang dijanjikannya ketika memenangi jawatan presiden parti tahun lepas, supaya pemimpin muda parti itu dapat terus membawa parti itu ke arah yang lebih memberangsangkan.

Mah yang berkecimpung dalam politik lebih dari dua dekad, mengakui pertandingannya dalam Pilihan Raya Kecil (PRK) Teluk Intan selaku Presiden Gerakan amat mencabar dan satu beban yang besar.

"Ia adalah perjuangan paling sukar sebagai presiden. Jika kalah ia akan beri kesan kepada parti dan saya tidak ada pilihan kecuali mengambil tanggungjawab sepenuhnya.

"Terima kasih kepada semua kerana memberi satu peluang lagi kepada saya dan parti untuk berkhidmat," katanya dan menambah pihaknya akan membuat analisis tentang kemenangan parti itu.

Pada PRK itu, Mah mengalahkan calon DAP Dyana Sofya Mohd Daud dengan majoriti undi yang amat kecil sebanyak 238, setelah memperoleh 20,157 undi berbanding 19,919 undi yang raih Dyana Sofya.

Menyentuh tentang keputusan pilihan raya itu, beliau berkata parti itu mendapat sokongan yang baik dari kawasan Dewan Undangan Negeri (DUN) Changkat Jong.

"Kami belum melihat butirannya tetapi pada dasarnya, kita menang besar di Changkat Jong namun sokongan merosot di (DUN) Pasir Bedamar. Sokongan daripada tiga komuniti menunjukkan peningkatan," katanya.

Mah berkata sokongan pengundi muda juga menunjukkan sambutan positif dan walaupun menang tipis namun ia juga merupakan satu pencapaian kepada BN setelah kalah 7,000 undi majoriti kepada calon DAP Seah Leong Peng pada PRU 2013.

Pada pertandingan tiga penjurur PRU 2013, dengan jumlah pengundi 48,839 orang atau 80.75 peratus daripada 60,483 pengundi, Mah mendapat 20,086 undi.

Pada PRK kali ini, beliau memperoleh 20,157 undi walaupun jumlah pengundi menurun kepada 66.67 peratus atau 40,236 pengundi daripada 60,349 pemilih berdaftar menunaikan tanggungjawab mereka.

Menyentuh tentang Dyana Sofya yang ingin menetap di Teluk Intan dan memberi fokus kepada masyarakat setempat, Mah menyambut baik kehadirannya dan berharap Dyana Sofya dapat memberi kerjasama untuk membangunkan bandar raya ini.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1042976>